

Films da pli baul e dad oz

Il Forum cultural Tujetsch organisescha ina notg da film

(anr/hh) **L'entschatta uost ha liug a Sedrun ina notg da film cun differentas producziuns, denter auter ina dil temps vargau. Il Forum cultural Tujetsch muossa numnadamein in film dil senior Tumaisch Monn. Quella documentaziun davart l'agricultura ei rodund 30 onns veglia.** Cun occasiun d'in arranschament special da stad ha la Televisiun Rumantscha mussau igl onn vargau ina partida films a Sedrun. Sin fundament digl interess mussaus dalla populaziun ei il Forum cultural Tujetsch sedecidius da cuntinuar en atgna reschia cun ina semeglianta purschida. Ils 6 d'uost ha liug sin plaz scola a Sedrun ina notg da film cun differentas producziuns da cineasts indigens e dalla regiun Surselva.

Da temps passai

Ina dallas producziuns che vegn mussada ei in film davart il puresser da Tujetsch avon rodund 30 onns. Quei film en color, mo senza tun, realisau da Tumaisch Monn da Sedrun, dat ina survesta dils fatgs agricols dils onns 70. El muossa la descargada, l'exposiziun da biestga cun la rangaziun suandonta, sco era autras lavurs dil pur, sco per exempel il scuder. Il film ei vegnius copiaus sin DVD, per aschia saver presentar el ussa sin tenda gronda. Plinavon muossa il Forum cultural Tujetsch entgins films cuorts da Movie Encarden. Ella tiarza part da quei pign festival da film tuatschin vegn allura aunc mussau in film actual. Ils presents san eleger sezs tgeinin ch'els vulan veser. Ils organisateurs presentan ina schelta cun quater producziuns: "Shrek 1", "Achtung, fertig, Charlie", "... und dann kam Polly" e "Herr der Ringe 3". Quei film cun las biaras vuschs vegn allura emess. Per la tecnica ei Roman Hendry responsabels.

Pliras finamiras

Cun quella notg da film persequiteschan ils treis commembers dil Forum cultural Tujetsch Tarcisi Hendry, Curdin Brugger e Bruno Berther pliras finamiras. "Ina da quellas ei segiramein d'animar ils indigens da far films. Tals ein e restan perdetgas dalla veta e dil temps", di Tarcisi Hendry ch'ei era archivar communal. Ils organisateurs vulan numnadamein instituzionalisar quella sera da film ed arranschar ina tala era ils proxims onns mintgamai duront la stad. Ina tala sera ei d'interess dils indigens e savess senz'auter era survir sco attracziun turistica, buc il davos per far enconuscent als hospes da vacanzas la cultura e la varietad dalla Val Tujetsch. "Nus ponderein per exempel era d'organisar ina concorrenza per films produci da niev", di igl organisatur.

Documentaziun da pli baul

In dils desideris dil Forum cultural Tujetsch ei da realisar in archiv cultural. "Quei ei ina dallas grondas sfidas ch'ei sin nossa gliesta da giavischs. Ussa stuein nus denton finir il project dalla restauraziun dalla ruina da Putnengia", di Tarcisi Hendry. Films vegls davart la Val Tujetsch existan differentes, biars ein en possess privat. Egl archiv dalla vischnaunca da Tujetsch sesanflan documentaziuns da film dils anno 30 da Lucas Berther. Plinavon exista era in film dalla tschentada da cumin a Muster digl onn 1971. "Nus vegnin segiramein a ponderar da mussar da quels films era ils onns vegnents. Forsa ch'in ni l'auter privat mettes medemamein a disposiziun las producziuns d'antruras", puntuescha Tarcisi Hendry La finamira d'in archiv cultural fust da rimnar litteratura, films, fotos, dias e maletgs da pli baul, mo era d'arcunar producziuns dad oz, per aschia segirar e cuntinuar cun la documentaziun. Il Forum cultural Tujetsch ei il mument era lundervi da preparar in calender illustrau pigl onn 2005. Quel cuntegn fotografias da Lucas Berther ch'ei morts igl onn 1965. Las fotos cun persunas e sujets dall'entira vallada ein vegnidas fatgas ils onns 1930 entochen 1940.

La notg da film sin plaz scola a Sedrun ha liug venderdis, ils 6 d'uost 2004 allas 20.30. En cass da malaura vegnan las producziuns mussdas en halla da gimnastica.